

# 13,700 pengasuh tak penuhi kelayakan

Kekurangan Taska berdaftar jelas kualiti, keselamatan kanak-kanak

Oleh Zanariah Abd Mutalib  
zanariah\_mutalib@nstp.com.my

Putrajaya

Lebih 80 peratus atau 13,700 pengasuh kanak-kanak berusia kosong hingga empat tahun yang berdaftar, masih tidak memenuhi kelayakan minimum lulus Kursus Asuhan dan Pendidikan Awal Kanak-Kanak PERMATA (KAP).

Timbalan Perdana Menteri, Datuk Seri Dr Wan Azizah Wan Ismail, berkata statistik Jabatan Kebajikan Malaysia (JKM) sehingga Jun lalu menunjukkan industri pengasuhan ketika ini menghadapi ma-

salah kekurangan pengasuh berdaftar, sekali gus memberi implikasi terhadap jumlah Taska yang berdaftar dengan jabatan itu.

## Isu kekurangan Taska

Beliau yang juga Menteri Pembangunan Wanita, Keluarga dan Masyarakat berkata, unjuran banci Jabatan Perangkaan Malaysia pada 2010 menganggarkan jumlah kanak-kanak berusia antara kosong hingga empat tahun pada tahun ini mencecah 2.3 juta orang.

“Jika kita beranggapan 50 peratus kanak-kanak pada usia berkenaan memerlukan Taska, maka negara kita memerlukan 38,333 Taska bagi menampung jumlah itu, namun statistik pendaftaran Taska JKM menunjukkan jumlah Taska berdaftar adalah 4,302 saja (11.22 peratus).

“Bilangan ini menunjukkan kekurangan amat jelas dari aspek keperluan dan ketersediaan Taska.”

“Kekurangan pengasuh berkelayakan dan bilangan Taska berdaftar akan memberi implikasi terhadap jaminan kualiti dan kese-

Berita Harian 13/08/2018 M1509



Bilangan ini menunjukkan kekurangan amat jelas dari aspek keperluan dan ketersediaan Taska”

**Dr Wan Azizah Wan Ismail,**  
Timbalan Perdana Menteri

lamatan anak-anak kita,” katanya berucap merasmikan sambutan Hari Taska 2018 di sini, semalam.

Yang turut hadir, Presiden Peratuan Pengasuh Berdaftar Malaysia (PPBM), Norsheila Abdullah.

Selain itu, Dr Wan Azizah berkata, walaupun Garis Panduan Penubuhan Tadika dan Taska sudah dikeluarkan, namun masih ada pengusaha mengambil langkah mudah dengan tidak mendaftarkan Taska mereka bagi mengelak mengeluarkan bayaran tambahan seperti fi penubuhan Taska, fi profesional perunding serta fi tambahan oleh pihak berkuasa tempatan (PBT).

## Gagal dapat kelulusan PBT

“Kegagalan pengusaha Taska mendapat kelulusan PBT akan menyebabkan Taska tidak boleh berdaftar dengan JKM,” katanya.

Dr Wan Azizah berkata, ketersediaan Taska amat penting bagi menyediakan sistem sokongan kepada ibu bapa bekerja dalam menguruskan anak-anak ketika tempoh mereka bekerja.

“Hal ini secara tidak langsung membantu negara mencapai matlamat meningkatkan penyertaan tenaga buruh dalam kalangan wanita sebanyak 59 peratus pada 2020, berbanding 54.7 peratus pada 2017,” katanya.

Sementara itu, Norsheila berkata, pihaknya mendapati banyak pengusaha Taska tidak menghantar pengasuh mereka berkursus sedangkan peraturan Taska menetapkan pengasuh mesti menghadiri kursus dalam tempoh setahun.

“Ini yang kita sering tekankan kepada semua pengusaha Taska berdaftar supaya memastikan latihan diberikan kepada pengasuh. Walaupun pengasuh ada diploma, ijazah atau sarjana, namun sijil kursus itu yang akan mengiktiraf mereka sebagai pengasuh berdaftar.

“Pengusaha juga disarankan sentiasa meningkatkan tahap kelayakan pengasuh seliaan mereka, bukan setakat kelayakan minimum saja, tetapi juga mereka tahu mengenai Akta Perlindungan Kanak-Kanak, nutrisi dan pengendalian makanan,” katanya.